

श्रीहित धूर्वदासजी महाराज कृत

श्री वृंदावन शतलीला



श्री हित प्रताप चंद्र गोस्वामी जी महाराज

श्री हित मज मोहन गोस्वामी जी महाराज

श्री हित निमिष गोस्वामी जी महाराज

!! श्रीहित राधावल्लभो जयति !!
!! श्रीहित हरिवंशचंद्रे जयति !!

प्रथम नाम हरिवंश हित, रटि रसना दिन रैन।
प्रीति रीति तब पाइयै, अरु वृंदावन ऐन ॥१॥
चरन सरन हरिवंश की, जब लगि आयौ नाहिं।
नव निकुंज निजु माधुरी, क्यों परसै मन माहिं ॥२॥
वृंदावन सत करन कौं, कीन्हों मन उत्साह।
नवल राधिका कृपा बिनु, कैसें होत निबाह ॥३॥
यह आसा धरि चित्त में, कहत जथा- मति मोर।
वृंदावन सुख रंग कौ, काहु न पायौ ओर ॥४॥
दुर्लभ दुर्घट सबनि तैं, वृंदावन निजु भौन।
नवल राधिका कृपा बिनु, कहि धौं पावै कौन ॥५॥
सबै अंग गुनहीन हौं, ताकौ जतन न कोइ।
एक किसोरी कृपा तैं, जो कछु होइ सु होइ ॥६॥
सोउ कृपा अति सुगम नहिं, ताकौ कौन उपाव।
चरन सरन हरिवंश की, सहजहिं बन्यौ बनाव ॥७॥
हरिवंश चरन उर धरनि धरि, मन वच कै विस्वास।
कुँवरि कृपा है है तबहिं, अरु वृंदावन वास ॥८॥

प्रिया चरन बल जानि कै, बाढ़यौ हियैं हुलास।
तेई उर में आनि हैं, वृंदाविपिन प्रकास॥९॥
कुँवरि किसोरी लाड़िली, करुनानिधि सुकुँवारि।
बरनौ वृंदाविपिन कौं, तिनके चरन सँभारि॥१०॥
हेममयी अवनी सहज, रतन खचित बहु रंग।
चित्रत चित्र विचित्र गति, छबि की उठति तरंग॥११॥
वृंदावन झलकनि झमक, फूले नैन निहारि।
रवि ससि दुतिधर जहाँ लगि, ते सब डारे वारि॥१२॥
वृंदावन दुति पत्र की, उपमा कौं कछु नाहिं।
कोटि कोटि बैकुंठ हू, तिहिं सम कहे न जाहिं॥१३॥
लता लता सब कलपतरु, पारिजात सब फूल।
सहज एक रस रहत हैं, झलकत जमुना कूल॥१४॥
कुंज कुंज अति प्रेम सौं, कोटि-कोटि रति मैन।
दिनहिं सँवारत रहत हैं, श्री वृंदावन ऐन॥१५॥
विपिन राज राजत दिनहिं, बरसत आनंद पुंज।
लुब्ध सुगंध पराग रस, मधुप करत मधु गुंज॥१६॥

अरुन नील सित कमल कुल, रहे फूलि बहुरंग।
वृंदावन पहिरैं मनौं, बहुविधि बसन सुरंग ॥१७॥
हित सौं त्रिविध समीर बहै, जैसी रुचि जिहिं काल।
मधुर मधुर कल कोकिला, कूजत मोर मराल ॥१८॥

मंडित जमुना वारि यौं, राजति परम रसाल।
अति सुदेस सोभित मनौं, नील मनिनु की माल ॥१९॥
विपिन धाम आनंद कौ, चतुरङ्ग चित्रित ताहि।
मदन केलि संपति सदा, तिहि करि पूरन आहि ॥२०॥

देवी वृंदा- विपिन की, वृंदा सखी सरूप।
जिहिं विधि रुचि है दुहुँनि की, तिहिं विधि करति अनुप ॥२१॥
छिन छिन बन की छबि नई, नवल जुगल के हेत।
समुझि बात सब जीय की, सखि वृंदा सुख देत ॥२२॥

गावत वृंदा-विपिन गुन, नवल लाड़िली-लाल।
सुखद लता फल फूल द्रुम, अद्भुत परम रसाल ॥२३॥
उपमा वृंदा विपिन की, कहि धौं दीजै काहि।
अति अभूत अद्भुत सरस, श्री मुख बरनत ताहि ॥२४॥

आदि अंत जाकौ नहीं, नित्त सुखद बन आहि।
माया त्रिगुन प्रपंच की, पवन न परसत ताहि॥२५॥
वृंदा विपिन सुहावनों, रहत एक रस नित्त।
प्रेम सुरंग रंगे तहाँ, एक प्रान द्वै मित्त॥२६॥
अति सरूप सुकुंवार तन, नव किसोर सुखरासि।
हरत प्रान सब सखिनि के, करत मंद मृदु हासि॥२७॥
न्यारौ है सब लोक तें, वृंदावन निज गेह।
खेलत लाड़िली लाल जहाँ, भींजे सरस सनेह॥२८॥
गौर स्याम तन मन रंगे, प्रेम स्वाद रस सार।
निकसत नहिं तिहिं ऐन तें, अटके सरस विहार॥२९॥
बन है बाग सुहाग कौ, राख्यौ रस में पागि।
रूप रंग के फूल दोउ, प्रीति लता रहि लागि॥३०॥
मदन सुधा के रस भरे, फूलि रहे दिन रैन।
चहुँदिसि भ्रमत न तजत छिन, भृंग सखिनि के नैन॥३१॥
कानन में रहे झलक कै, आनन विवि विधु काँति।
सहज चकोरी सखिनि की, अखियाँ निरखि सिराँति॥३२॥

ऐसे रस में दिन मगन, नहिं जानत निसि भोर।
वृंदावन में प्रेम की, नदी बहै चहुँ ओर॥३३॥
महिमा वृंदाविपिन की, कैसें कै कहि जाइ।
ऐसै रसिक किसोर दोउ, जामें रहे लुभाइ॥३४॥
विपिन अलौकिक लोक में, अति अभूत रसकंद।
नव किसोर इक वैस द्रुम, फूले रहत सुछंद॥३५॥
पत्र फूल फल लता प्रति, रहत रसिक पिय चाहि।
नवल कुँवरि दृग छटा जल, तिहि करि सींचे आहि॥३६॥
कुँवरि चरन अंकित धरनि, देखत जिहि- जिहि ठौर।
प्रिया चरन रज जानि कै, लुठत रसिक सिरमौर॥३७॥
वृंदावन प्यारै अधिक, यातें प्रेम अपार।
जामें खेलत लाड़िली, सर्वसु प्रान अधार॥३८॥
सबै सखी सब सौंज लै, रंगी जुगल ध्रुव रंग।
समै समै की जानि रुचि, लियै रहति हैं संग॥३९॥
वृंदावन वैभव जितौ, तितौ कह्यौ नहिं जात।
देखत संपति विपिन की, कमला हू ललचात॥४०॥

वृंदावन की लता सम, कोटि कल्प तरु नाहिं।
रज की तुल बैकुंठ नहिं, और लोक किहिं माहिं॥४१॥
श्रीपति श्री मुख कमल कह्यौ, नारद सौं समुझाइ।
वृंदावन रस सबनि तें, राख्यौ दूर दुराइ॥४२॥
अंसकला अवतार जे, ते सेवत हैं ताहि।
ऐसै वृंदाविपिन कौं, मन वच कै अवगाहि॥४३॥
सिव बिधि उद्धव सबनि कै, यह आसा रहै चित।
गुल्म लता है सिर धरै, वृंदावन रज नित॥४४॥
चतुरानन देख्यो कछुक, वृंदाविपिन प्रभाव।
द्रुम द्रुम प्रति अरु लता प्रति, औरै बन्यौ बनाव॥४५॥
आप सहित सब चत्रभुज, सब ठाँ रह्यौ निहारि।
प्रभुता अपनी भूलि गयौ, तन मन कै रह्यौ हारि॥४६॥
लोक चतुर्दश ठकुरई, संपति सकल समेत।
सब तजि बसि वृंदाविपिन, रसिकन कौ रस खेत॥४७॥
सकहि तौ वृंदाविपिन बसि, छिन छिन आयु बिहात।
ऐसौ समै न पाइहै, भली बनी है बात॥४८॥

छाँड़ि स्वाद सुख देह के, और जगत की लाज।
मनहिं मारि तन हारि कै, वृंदावन में गाज ॥४९॥
वृंदावन के बसत ही, अंतर जो करै आनि।
तिहि सम सत्रु न और कोउ, मन वच कै यह जानि ॥५०॥
वृंदावन के वास कौ, जिनकैं नाहिं हुलास।
माता मित्र सुतादि तिय, तजि ध्रुव तिनकौ पास ॥५१॥
और देस के बसत ही, अधिक भजन जौ होइ।
इहि सम नहिं पूजत तऊ, वृंदावन रहै सोइ ॥५२॥
वृंदावन में जो कबहुँ, भजन कछू नहिं होइ।
रज तौ उड़ि लागै तनहिं, पीवै जमुना तोइ ॥५३॥
वृंदाविपिन प्रभाव सुनि, अपनी ही गुन देत।
जैसें बालक मलिन कौं, मातु गोद भरि लेत ॥५४॥
और ठाँव जो जतन करै, होत भजन तउ नाहिं।
ह्याँ फिरै स्वारथ आपनै, भजन गहैं फिरै बाँहिं ॥५५॥
और देस के बसत ही, घटत भजन की बात।
वृंदावन में स्वारथौ, उलटि भजन है जात ॥५६॥

जद्यपि सब औगुन भरयौ, तदपि करत तुव ईठ।
हितमय वृंदाविपिन कों, कैसें दीजै पीठ ॥५७॥
वृंदावन तें अनत ही, जेतिक द्यौस विहात।
ते दिन लेखे जिनि गनौ, वृथा अकारथ जात ॥५८॥
भजन रसमयी विपिन धर, समुझि बसै जौ कोइ।
प्रेम बीज तिहिं खेत तें, तब ही अंकुर होइ ॥५९॥
जद्यपि धावत विषै कों, भजन गहत बिच पानि।
ऐसै वृंदाविपिन की, सरन गही "ध्रुव" आनि ॥६०॥
बसिबौ वृंदाविपिन कौ, जिहिं तिहिं विधि दृढ़ होइ।
नहिं चूकै ऐसौ समै, जतन कीजियै सोइ ॥६१॥
कहाँ तू कहाँ वृंदाविपिन, आनि बन्यौ भल बान।
यहै बात जिय समुझि कै, अपनों छाँड़ि सयान ॥६२॥
छिन भंगुर तन जात यह, छाँड़हि विषै अलोल।
कौड़ी बदले लेहि तू, अद्भुत रतन अमोल ॥६३॥
कोटि कोटि हीरा रतन, अरु मनि विविध अनेक।
मिथ्या लालच छाँड़ि कै, गहि वृंदावन एक ॥६४॥

नहिं सो माता पिता नहिं, मित्र पुत्र कोउ नाहिं।
इनमें जो अंतर करै, बसत वृंदावन माँहि ॥६५॥
नाते जेते जगत के, ते सब मिथ्या मानि।
सत्य नित्य आनंदमय, वृंदावन पहिचानि ॥६६॥
बसि कै वृंदाविपिन में, ऐसी मन में राख।
प्राण तजौं बन ना तजौं, कहौ बात कोउ लाख ॥६७॥
चलत फिरत सुनियत यहै, श्री राधावल्लभ लाल।
ऐसे वृंदाविपिन में, बसत रहौ सब काल ॥६८॥
बसिबौ वृंदाविपिन कौ, यह मन में धरि लेहु।
कीजै ऐसौ नैम दृढ़, या रज में परै देह ॥६९॥
खंड खंड है जाइ तन, अंग अंग सत टूक।
वृंदावन नहिं छाँड़ियै, छाँड़िबौ है बड़ी चूक ॥७०॥
पटतर वृंदाविपिन की, कहि धौं दीजै काहि।
जिहिं रज की ध्रुव रेंनु में, मरिबौउ मंगल आहि ॥७१॥
वृंदावन के गुननि सुनि, हित सौं रज में लोटि।
जेहि सुख कौं पूजत नहीं, मुक्ति आदि सत कोटि ॥७२॥

सुरपति पसुपति प्रजापति, रहे भूलि तिहिं ठौर।
वृंदावन वैभव कहौ, कौन जानि है और॥७३॥
जद्यपि राजत अवनि पर, सब तें ऊँचो आहि।
ताकी सम कहियै कहा, श्रीपति वंदत ताहि॥७४॥

वृंदावन वृंदाविपिन, वृंदा -कानन ऐन।
छिन छिन रसना रट्यौ करि, वृंदावन सुखदैन॥७५॥
वृंदावन आनंदघन, तो तन नस्वर आहि।
पसु ज्यों खोवत विषै रस, काहि न चिंतत ताहि॥७६॥
वृंदावन वृंदा कहत, दुरित वृंद दुरि जाहिं।
नेह बेलि रस भजन की, तब उपजै हिय माहिं॥७७॥
वृंदावन श्रवननि सुनहि, वृंदावन कौ गान।
मन वच कै अति हेत सों, वृंदावन उर आन॥७८॥

वृंदावन कौ नाम रटि, वृंदावन कौ देखि।
वृंदावन सों प्रीति करि, वृंदावन उर लेखि॥७९॥
वृंदाविपिन प्रनाम करि, वृंदावन सुख खानि।
जो चाहत विश्राम ध्रुव, वृंदावन पहिचानि॥८०॥

!! श्रीहित राधा वल्लभो जयति !!
!! श्रीहित हरिवंशचंद्रो जयति !!

तजि कै वृंदाविपिन को, और तीर्थ जे जात।
छाँड़ि विमल चिंतामनी, कौड़ी कौं ललचात ॥८१॥
पाइ रतन चीन्ह्यौं नहीं, दीन्हौ कर तैं डारि।
यह माया श्री कृष्ण की, मोह्यो सब संसार ॥८२॥
प्रगट जगत में जगमगै, वृंदाविपिन अनूप।
नैन अछत दीसत नहीं, यह माया कौ रूप ॥८३॥
वृंदावन कौ जस अमल, जिहि पुरान में नाहिं।
ताकी बानी परौ जिनि, कबहुँ श्रवननि माँहि ॥८४॥
वृंदावन कौ जस सुनत, जिनकें नाहिं हुलास।
तिनकौ परस न कीजिये, तजि ध्रुव तिनकौ पास ॥८५॥
भुवन चतुर्दस आदि दै, है है सब कौ नास।
इकछत वृंदाविपिन घन, सुख कौ सहज निवास ॥८६॥



॥ वृंदावन की रहनी ॥

वृंदावन इहि विधि बसै, तजि कै सब अभिमान।

तुन तैं नीचौ आपकौं, जानै सोई जान ॥८७॥

कोमल चित सब सौं मिलै, कबहुं कठोर न होइ।

निस्प्रेही निर्वैरता, ताकौ सत्रु न कोइ ॥८८॥

दूजै तीजै जो जुरै, साक पत्र कछु आइ।

ताही सौं संतोष करि, रहै अधिक सुख पाइ ॥८९॥

देह स्वाद छुटि जाइँ सब, कछु होइ छीन सरीर।

प्रेम रंग उर में बढे, बिहरै जमुना तीर ॥९०॥

जुगल रूप की झलक उर, नैननि रहै झलकाइ।

ऐसे सुख के रंग में, राखै मनहि रंगाइ ॥९१॥

आवै छबि की झलक उर, झलकै नैननि वारि।

चिंतत स्यामल गौर तन, सकहि न तनहि संभारि ॥९२॥

जीरन पट अति दीन लट, हियैं सरस अनुराग।

विवस सघन वन में फिरै, गावत जुगल सुहाग ॥९३॥

रसमय देखत फिरै वन, नैननि बन रहै आइ।
कहुँ- कहुँ आनंद रंग भरि, परै धरनि थहराइ ॥९४॥
जुगल रूप की झलक उर, नैननि रहै झलकाइ।
ऐसे सुख के रंग में, राखै मनहि रंगाइ ॥९१॥
आवै छबि की झलक उर, झलकै नैननि वारि।
चिंतत स्यामल गौर तन, सकहि न तनहि सँभारि ॥९२॥
जीरन पट अति दीन लट, हियैं सरस अनुराग।
विवस सघन वन में फिरै, गावत जुगल सुहाग ॥९३॥
रसमय देखत फिरै वन, नैननि बन रहै आइ।
कहुँ- कहुँ आनंद रंग भरि, परै धरनि थहराइ ॥९४॥
ऐसी गति है है कबहुँ, मुख निसरत नहिं बैन।
देखि-देखि वृंदाविपिन, भरि- भरि ढरै नैन ॥९५॥
वृंदावन तरु-तरु तरै, ढरै नैन सुख नीर।
चितंत फिरै आवेस बस, स्यामल गौर सरीर ॥९६॥
परम सच्चिदानंदघन, वृंदाविपिन सुदेस।
जामें कबहुँ होत नहिं, माया काल प्रवेस ॥९७॥

!! श्रीहित राधा वल्लभो जयति !!
!! श्रीहित हरिवंशचंद्रो जयति !!

सारद जो सत कोटि मिलि, कलपन करें विचार।

वृंदावन सुख रंग कौ, कबहुँ न पावैं पार॥९८॥

वृंदावन आनंद घन, सब तें उत्तम आहि।

मो ते नीच न और कोउ, कैसे पैहों ताहि॥९९॥

इत बौना आकास फल, चाहत है मन माहिं।

ताकौ एक कृपा बिना, और जतन कछु नाहिं ॥१००॥



॥ उपसंहार ॥

कुँवरि किसोरी नाम सौं, उपज्यो दृढ़ विस्वास।
करुनानिधि मृदु चित्त अति, तातैं बढी जिय आस॥१०१॥
जिनकौ वृंदाविपिन है, कृपा तिनहिं की होई।
वृंदावन में तबहि तौ, रहन पाइहै सोइ॥१०२॥
वृंदावन सत रतन की, माला गुही बनाइ।
भाल भाग जाके लिखी, सोई पहिरै आइ॥१०३॥
वृंदावन सुख रंग की, आसा जौ चित होइ।
निसि दिन कंठ धरै रहै, छिन नहिं टारै सोइ॥१०४॥
वृंदावन सत जो कहै, सुनिहै नीकी भाँति।
निसि दिन तिहिं उर जगमगै, वृंदावन की काँति॥१०५॥
वृंदावन कौ चिंतवन, यहै दीप उर बारि।
कोटि जनम के तम अघहिं, काटि करै उजियारि॥१०६॥
बसि कै वृंदाविपिन में, इतनौ बड़ौ सयान।
जुगल चरन के भजन बिन, निमिष न दीजै जान॥१०७॥

सहज विराजत एक रस, वृंदावन निज धाम।
ललितादिक सखियन सहित, क्रीडत स्यामा स्याम ॥१०८॥

प्रेम सिंधु वृंदाविपिन, जाकौ अंत न आदि।
जहाँ कलोलत रहत नित, युगल किसोर अनादि ॥१०९॥

न्यारौ चौदह लोक तें, वृंदावन निजु भौन।
तहाँ न कबहुँ लगत है, महाप्रलय की पौन ॥११०॥

महिमा वृंदा विपिन की, कहि न सकत मम जीह।
जाके रसना द्वै सहस,तिन हूँ काढी लीह ॥१११॥

एती मति मोपै कहाँ, सोभा निधि वनराज।
ढीठौ कै कछु कहत हौं, आवत नहिं जिय लाज ॥११२॥

मति प्रमान चाहत कह्यौ, सोऊ कहत लजात।
सिंधु अगम जिहिं पार नहिं, कैसें सीप समात ॥११३॥

या मन के अवलंब हित, कीन्हौ आहि उपाइ।
वृंदावन रस कहन में, मति कबहुँ उरझाइ ॥११४॥

सोलह सै ध्रुव छ्यासिया, पून्यौ अगहन मास।
यह प्रबंध पूरन भयौ, सुनत होत अघ नास ॥११५॥